

曾忠襄公書札

曾忠襄公書札

卷之十目錄

復程尙齋

復黃子壽

復李雨蒼

復馮竹儒

復蔣芝純

致劉韞齋中丞

復劉毅齋

復周鑑湖朱茗生葉蘭臺

致左季高宮保

復左季高宮保

復黃蘊臣

復黃蘊臣

致黃蘊臣

致李筱湘中丞

復李中堂

復張建侯

復譚文帥

復卓黼侯

致阿嘯珊

致卓輔侯

復黃蘊臣

復丁穉璜

復何小宋

復李中堂

致朱雲甫

復李中堂

致溫味秋

復蕭杞山

復劉峴帥

致沈幼丹

致崇地山

致劉峴帥

復朱翼甫

致李中堂

復吳清卿

致夏子松

復崔季芬

復丁樂山

復閻丹初

復李靜山

致丁雨生

復朱翼甫

復閻丹初

復龍芝生

致李眉生

復葆芝岑

復德曉峯

致葆芝岑

復徐壽蘅

復凌問樵

致李筱帥

復王鼎丞

復閻丹初

復郭蕙誠

復郭筠仙

致劉南雲

致朱茗生

致張建侯

復馬級三

復馬級三

復李中堂

復山西各京官公函

曾忠襄公書札卷十

復程尙齋

專勇至得讀惠書烟臺事已定議所索各條去其太甚尙於國體無傷然卽此一波三折在彼未滿所欲在我所失已多事後不無可慮迫於時局固無可如何者也楚岸引地彼此各挾一說而部中復有所偏重同是公忠謀國而意見牴牾恐於公事掣肘且令司其事者左右爲難耳弟承乏於斯愧無涓效乃有晉疆之命非意所期愈增慚悚現正拜疏陳請展覲俟奉批回祇遵新任子和制軍菊初假滿即使在京在道均無耽擱亦須小春方能到此河事入秋暑有變幻隨時守禦未

生巨險諸足報慰

復黃子壽

昨奉手示備聆近事海外煙波比已靖謐 縱音宣布中外翕然藉非合肥爵相洞達夷情處以鎮靜示以優容卽此口舌紛爭不知伊於胡極况鬼域之計百出相嘗相持愈久變幻愈多危疑震撼之秋誰竇毅然自任者相國孤忠亮節可敬可欽而帷幄密謀借箸於當代名儒蓋亦不少三復來書益徵謙抑佩甚幸甚筠老激昂慷慨本不以遠遊自阻兼荷 温諭拊循更覺感而思奮和局旣就行期當亦不遠令嗣保陽調理舊恙霍然同爲欣慰青餘方伯不時握晤已將瑤函送閱鄙狀碌碌無

足述者河事粗平藉以報慰

復李雨蒼

前復寸函當已先此得達昨奉七月杪手函烏垣克捷實爲全局得手之機賊眾狡悍著稱至此而不敢負嵎卒黨潛遁其平時震懾聲威亦可想見雖慮餘燼復然糾合以圖再逞誠亦意計中事然經此慲創之後力蹙技窮我悉精銳以躡之以金軍扼守於北合湘蜀豫三軍之力環攻於南布置旣密應無竄突之虞西域肅清在此一舉烟臺會議之件分別輕重量予准駁酋眾俯首無辭合肥爵相據以入告卽御輪回津綸音宣布從此可以相安弟以菲陋承乏於斯正慚素食乃奉量移晉

撫之 命益切悚惶現已拜疏請 觀俟新任到梁約在小春
上浣目恙迄未全愈然藥石屢試無益亦遂淡然置之承殷殷
注念感何可言餘各粗平足以報慰

復馬竹儒

得六月二十五手書彼族所請口岸聞已委曲相從而捐稅兩
大宗關係 國用民命勢不能輕於一諾乃以此事忿爭迭起
波瀾迄無成說誠如所示徒事補苴實不足以振積弱然威箇
徘徊滬上虛疑恫喝之外不聞別有陰謀蓋旣大言以肆其要
求仍復束手以觀我動靜處心積慮未嘗無意於轉圜不得已
請爵相烟臺相見此番移蘄東征或竟化有事爲無事亦未可

知畿輔一帶得雨深透人心爲之大定惟江右閩中水患甚重議賑議貸需用孔多而庫款奇絀當事頗費經營耳

復蔣芝純

日前肅復計達籤曹昨得前月底惠翰欣審塞外捷音以手加額慶幸何如古牧地烏城兩處賊眾精銳所聚議者謂深溝高壘未易猝平而旬日之間先後規復雖白逆鬼脫餘焰猶張而值其驚魂未定之時繼之以窮追截擊想檻獸釜魚亦無所施其伎倆且兩城旣克凡於駐軍屯糧在在足以自固尤大局之幸也承示捷報備極詳盡方魚函之遠惠正鳳翥之監臨瑣闈啟鑰比已轉達李中丞同博一快

致劉韞齋中丞

國荃由湘起程四月乃抵太原接篆視事伏念渥荷 聖朝知遇之隆吾師屬望之切苟精力稍可爲役曷敢不振刷以從昔聞山右差號易治古稱儉勤之俗戶擅財富之名或者勉策駑駘隕越較渺彌月以來察訪情形其潞澤遼沁太足迹所已經者固已物產蕭條民氣凋瘵其未厯之境詢之僚友僉曰憔悴更甚司庫歲入不過三百萬有奇而出款乃逾五百萬兩常年已屬不敷遠甚矧又連歲不登乎內而京餉固本餉外而協餉指撥專餉以及本省防餉練餉咨牘雪片而來委員川流而至減之不可緩之不能華翁之所以汲汲求退者此也今者亢陽

不雨又已半年夏麥無收秋禾未種民間顛連之狀賣妻鬻子
掘草根捋樹皮團土丸以充饑者所在皆是民困至此其何以
存活之耶屢次祈雨迄不一應國荃德薄福淺不足以仰迓和
甘願蹈在卽彌用悚惶昨已據情陳奏請留京餉二十萬以爲
賑資天恩浩蕩俯如所請第恐升斗之糈不足以蘇百萬之
命也司庫罄懸所謂二十萬者尙須臨渴掘井救荒本無善策
慮在立法不善用人不當以致費虛糜而民無實惠不謂籌款
之難視立法用人爲尤甚也師門夙以濟人利物爲懷知必有
剏切指示俾得奉補時艱者瞻望程門依依不盡知荷注存瑣
屑奉述

復劉毅齋

四月二十六日得正月二十七日瑤函語長心重關山遠隔何以爲懷承示塞外軍情瞭如指掌惟麾下馳域外之觀建匡濟之畧具澄清之志立不世之勲甘泉夜奏捷報頻來中外忻忭賢愚同頌惟念軍行愈遠兼顧爲難轉饋時虞其不繼前程計數其尙遙念之驚心聞之擣舌幸麾下仔肩鉅任與恪靖伯相一心報國相與有成非第西北之慶是誠朝廷之福卓勝軍聞於客臘拔幟前來正月杪已度玉門得此一枝或爲後勁弟去冬因病乞假求退未能更效蜩飛又添蛇足二月杪力疾由湘啟程襄樊登陸取道太行四月二十三日乃抵太原昔聞晉

稱沃野今乃地號瘠區民不聊生道皆餓莩撫九郡十州之生齒補千創萬孔之漏卮供億繁多而庫儲早匱蓋藏空乏而饑饉薦臻望陸海之汪洋旣移粟移民而皆不得其術宜中朝之詰責實左支右絀而內無以自存華潭中丞德厚才高支持期年近亦云朝不謀夕靜俟鯀生之入甕弟乃以孱弱病軀蟲處其間顛踣定在指顧夫復何說夙荷麾下垂愛用敢瑣屑佈陳塞外寒暑不時伏惟珍重有用之身以慰民望

復周鑑湖朱茗生葉蘭臺

頃奉手函備承拳注展誦再四感佩弗谖晉省荒旱情形早邀洞鑒前疏籲留京餉二十萬兩仰蒙　俞允　天恩已極高厚

然晉省普旱得之正如杯水車薪不過權濟目前初擬速得透雨秋收可望幾分乃節臨大暑屢禱弗應德薄福淺不足以仰迓和甘未知晉民何辜罹此奇厄民命莫保守土者之罪可勝言哉倉穀動放已空官捐民捐均非一次以所留之京餉二十萬兩散布於六七十州縣之民頃刻瓶罄前片願請酌留丁丑戊寅兩年釐金冀倖以此作抵可借二十萬兩以繼賑也又請辦捐准給獎敘庶幾出捐者踴躍可望多活人性命也嗣因奉旨所請著毋庸議不特借者不肯借卽捐者亦不肯捐然萬無坐視蒼赤垂斃之理鄙意擬仿滇黔捐輸請頒空白執照一面就地勸捐一面委員前赴商賈輻輳之區勸晉民之貿

易他省者羣急桑梓之難或可集腋成裘賑濟民命弟與穎叔
蓉舫諸君子日來心如懸旌搖搖不定夙叨擊愛用敢縷商如
尊處詢訪以爲可行卽乞示知以便專疏入告一俟欽奉
諭旨即可興辦俾三晉被災之郡縣全活殘喘皆出自鴻慈之
賜拜德豈有涯耶臨穎不勝企禱之至

致左宮保

國荃甫莅晉疆具陳近狀計登青覽日來捧讀捷疏敬悉我公
帷幄如神指揮若定慶堅城之迭下彌盪決而無前豐功偉烈
超邁漢唐卽晉侯封奚如雀祝國荃抵任五旬禱雨已四十日
靡神不舉無術蘇息昨雖稍獲甘霖然節候已過入土未深非

再得透雨補種蕎麥此外別無可以存活民命之法救荒以辦賑爲第一要務劃扣京餉二十萬兩天恩不爲不渥而被災之處過寬車薪杯水其濟幾何況又迫不及待全恃受災較輕之域徵收上忙以應急需乃報解之數不及歷年十分之二坐視垂斃之民而不能全活十之五六守土之罪可勝言哉甘省年成何似關外氣象一新我公威福旋轉乾坤之所賜也文卿中丞來函稱各省協餉報解寥寥殊深繫念晉中旱狀如此國荃與穎叔方伯日夜焦思欲效涓滴之助稍盡公誼私情於萬一而天之困阨於晉省者特甚力不從心罔知所措久未奉我公教言伏祈將近日情狀惠示一二以釋下懷黑茶果應如何

辦法而後通暢並希訓告

復左宮保

日昨復貢蕪函計猶在道奉六月六日手教備荷注存指示周詳欽感無似晉中近狀已先後奉聞節屆立秋望澤尤殷雨得微雨之後連日炎敵如火土脈復乾不審晉民何辜罹此凶阨國荃會逢其適夫復何言再誦另渝論及黑茶一節日來檢查全卷晉人旣有興販雜茶成案又有俄邊出路可通而謂並不夾帶湖茶其誰信之第相沿旣久名目愈巧禁固不易卽無論何項茶葉統令照章一律完納課釐雖私猶公其法極良但其中實亦甚難似須酌量分別緣雜茶品低價賤較湖茶相去天

淵自產所採買到晉沿途節節關卡完釐已非一次成本既重
益以出口腳價不惟無利可圖且多折本訪聞張家口各行積
茶若山卒未起運出口者職是之故若再照湖茶每引八十觔
加以課釐四兩零必不樂於從事強之使就我程度勢必裹足
不前其雜茶利微特假借其名夾帶湖茶以獲利更可想見今
欲區別變通期無窒礙似宜雜茶一項仍令照常惟夾帶之湖
茶以及詭混各種責令照納釐課庶該商無可置辯而甘商茶
釐減去八成本輕而利厚晉商茶釐不減本重而利輕久之則
私販不禁而自絕然而因私獲利已非一日尤非一處孰肯舍
己從公求其認真稽查亦憂憂乎其難矣國荃莅晉日淺相距

云遙據理而論此種情形恐所不免容當派員密查究竟晉商
販運雜茶實有幾種張家口所存是否雜茶抑或夾以湖茶是
何名目俟得實據想出辦法方可依令奉行中堂明燭萬里以
爲然否

復黃蓋臣

頃披手函知因公久勞近體欠爽旋占勿藥之喜欣慰良深惟
天時燥熱尙祈隨時珍重有用之身爲企責部練餉度支未能
按月照發良深抱歉在成軍之初閣下已料庫款不充具有先
見之明不意今歲亢旱遂至於此然干口之嗷嗷固屬可憫徧
地之哀鳴亦殊可念兵民同一晉人兵究較勝於民練兵又較

勝於營兵時勢所迫非盡人謀之不臧尙祈於認眞之中維繫
人心三軍之士莫不感挾纊之恩矣頴叔方伯近日極力籌畫
卽日當湊款交謝府經解回大營以應急需至於撤練歸伍之
說前任所奏定之案何可更易揀員接統不特弟處無可靠之
人卽閣下心意中亦必無可薦之賢足以代任其勞者且一軍
甫練戎務方有起色閣下春秋鼎盛報効國恩正當及時竭
力委質豈可遽作息肩之想公忠體國乃閣下之素志瞻顧
退縮諒非閣下之所願爲時艱共濟是在有道者自行策勵不
可存知難而退之念致負朝廷之期望弟待同寅毫無他長
惟尙能守開誠布公之誼而已伏祈寬懷爲要

復黃蓋臣

頃接還章知十四日排遞一函業已達覽承示韓民滋事已飭
沿河營弁分守渡口實力嚴防具徵布置周密連日接據各處
稟報情形大略相同烏合之徒因饑望屋而食一經捕緝勢必
鳥散然秦晉僅隔一河晉之荒旱較秦尤甚查災放賑先安民
心爲要早經穎叔方伯委員分查俟各路稟覆到晉通盤籌計
酌量分潤惟是災區太廣賑款無多民間饑苦現已迫不及待
冬令必更不堪接至來年麥收爲日方長籌及接濟經費則無
不蹙額者總之無論如何爲難凡可以爲民活計斷不肯稍存
漠視其實在應賑者固宜曲加體恤而藉端生事者亦必隨時

懲創雖不忍操之太急然亦不敢失之過寬至於佈散流言匿名揭帖斷非饑民舉動必有奸宄招謠潛蹤其間此清查境內無業游民爲最要也地方官果能清查勿令聚黨生事如遇外來面生可疑之人不准溷跡境內庶本境之饑民望有涓滴之賑可以度活而不敢萌異志各路之宵小憚吾嚴密之防無從勾結而不敢生覬覦消患於未然此其時也閣下精明穩練審時度勢定能嚴爲彈壓則省南各屬倚爲屏蔽實利賴之

致黃蘊臣

昨復寸榆計邀青睞日來接據各路探報陝西韓邵土匪勾結饑民滋事經文卿中丞檄調重兵前來業已分別解釋蒲城刀

匪蠢動旋移韓郤之師往捕聞亦鳥散此有形之患不足爲害
惟無形之隱宜先預防秦晉毗連冬令冰結黃河處處可通加
以饑餉薦臻防務尤關緊要北路以建侯軍門所部駐紮河保
包頭清釐後山一帶搜巡馬賊游匪當可無虞初擬將樹字營
調至河津上下以備南路旋因北路過於空虛恐生枝節且南
路有麾下爲長城貴部練軍足資屏蔽所望賢者極力整齊務
使添練之兵無不以一當十以十當百萬一冬令陝境有警則
防河之任全仗麾下爲晉南之藩籬士民幸甚除備牘咨達外
用特先函佈意

致李筱湘中丞

密啟者林潞民人互爭山界一案業經五載據府縣查勘及久
官晉省之道府各員詳加詢問以所爭之地晉省既有遠年碑
碣可憑又有潞民糧單林民租契可據考諸府縣志載界畫清
晰以道里之遠近山形之屈曲稽之歷年均屬晉境管理在林
邑小民因利圖佔係屬常情在地方印委各官理宜持平定斷
方可永息爭端乃晉之葛令豫之王令上次竟以意見不和於
會勘時互相爭辯而散官且如此無怪鄉里之纏訟不休弟商
諸頽叔方伯簪舫廉訪已將葛令先行撤省惟案懸未結潞邑
民人控案以後地被林民強佔猶復年年照舊完糧第憤激不
平思欲一逞械鬪弟聞此信深恐愚民無知別生枝節伏思潞

林蒼赤皆我公惠澤之子民至今蒙愛遠垂必無分於晉與豫
也案之曲直是非定邀洞鑒特此函商務祈我公俯念該民人
等訟經五載廢時失業應請台端嚴飭府縣及委勘之員准於
十月初一曰齊集山內與晉員和衷會勘秉公據理剖判審結
深爲公便論者謂王令意氣殊不平正若非離任則此案終無
了結之期如我公不動聲色另行預先遴員接署林篆庶彼此
得以相商林之刁民失其所恃不敢據非理以相爭此案可期
速結不特潞邑良懦咸沐仁施卽弟與頴叔馨舫諸君亦共感
高誼於無涯矣情愛密商縷陳統祈酌奪示復爲盼

復李中堂

七夕後二日奉初五日惠書並大咨敬聆壹是山右荒旱情形
迭經縷布六月十二三日雖得雨兩次並未深透入土立乾且
節候已逾卽補種蕎麥亦屬無益前辦夏災已不能了今秋災
又成爲地既廣而爲日更久賑費所需甚鉅京餉二十萬雖經
截留庫中尙無現款上忙所收不及往年三分之二已儘數湊
解京餉與西征軍餉矣迄今兩月尙未湊足賑款二十萬之數
萬不得已舉辦捐輸曾於六月二十九日拜摺後飛布一函求
中堂將上年天津捐案章程寄示以便循照辦理想已達典籤
也溫洗馬義切桑梓請尊處先撥借海防經費銀一二十萬兩
以應急用仰蒙關愛於萬分拮据之中俯允借撥十萬具徵隆

情摯誼援手於雲天之上三晉士民感戴活命之恩曷其有極
頃與穎叔方伯簪舫廉訪商定卽日委員趨轅祇領至歸還之
期以半年爲期斷不敢稍涉延緩致誤要需山西進款雖少然
大開捐輸請有空白執照先以所收爲歸還海防之要款當可
如願相償除備牘先行咨呈外謹將不盡之言縷陳鈞察

復張建侯

日昨函候起居正局無簡頃展華翰若接清談承示大青烏拉
兩山後綿亘數千里土著甚少外來游勇奸民藏匿其間已非
一日歷年駐軍鎮攝故不敢出而爲患自卓軍西向勇丁憚於
遠行中途逃回者頗多勾結土匪意圖劫掠非有他志嘗聞古

語養兵千日用在一朝該逃勇不願隨統帥出關飽而遠颺按之軍例罪已非輕况又肆行劫搶乎良由該軍紀律太寬任所部置眷安家是以兵氣不揚今旣嘯聚搶擄使邊陲居民不得聊生未可原情寬恕昔也隸卓勝軍伍之內尙能衛民吾輩當愛之重之今也私自逃出營伍爲邊民之害吾輩未便聽其養癱麾下此次辦法甚有調理若輩聞風鳥散雖經鴻裁分別次第清查特未知若輩果能自新否國家憲典除暴所以安良最忌姑息恐啟釀姦之漸此次禍已消除總期能杜後患爲妙統望偉度碩畫相機施行寬嚴得中以乂安地方至要至要台駕來省一層正在辦理緊要之時麾下宜駐行營指麾調度不

可遽動恐失民望吾輩共事之日方長秋涼握手尚不爲遲

復譚文帥

昨貢蕪函計登籤閣頃奉華翰備荷藻飾三復臨風五中篆竹
弟力疾來晉適逢旱災二麥不登秋禾未播塗有餓莩道皆流
亡日深焦灼無從措手所幸棠疆近接夙叨愛注諒必有以教
我捧誦另榆並示疏稿令人不敢卒讀關外之役論者咸謂時
事尙艱不宜復勤遠略然恪靖伯相業已一意前驅斷無中止
之理昨又一鼓而下三城事機不爲不順所可慮者軍行愈遠
餉餽愈難各省事會靡常協款借款未易如期到岸朝廷俯
如大疏所請先顧目前隨後並催協借藉資接濟前敵乃無饑

瀆之虞幸甚幸甚至於晉省應解之項爲數尙多早旣太甚徵
收毫無把握司庫早負山積之債官民皆同轍涸之魚昨乃陳
請飭撥各省協晉之款逕解西征糧臺轉解大營未知能邀俞
允否將伯之呼係出於萬不得已非推諉也閣下智珠在抱通
籌全局豈惟鎖鑰秦關卽晉中亦大蒙庇蔭祝頌無量之純方
伯老成持重經久不懈體弱善病良殷繫念今已霍然我公臂
助有人光分鄰壁同深慶慰

復卓黼侯

頃展惠函並公牘具悉丙子綱額引尙存二千六百餘名河東
鹽引滯銷固非一日展限已屆尙存如此之多實爲今年所獨

有愈積愈鉅新引不能及時開徵年累一年何所底止擬請仿
照上年成案將積引分年帶銷俾丁丑綱可以及早開辦所議
良是惟上年未完額引僅八百餘名奏請分年帶銷幾費經營
始得邀准部中原奏曾經聲敘如下屆復有遲逾再行瀆請定
當卽行奏駁並查取職名隨摺附參等語甫經半載復以二千
餘名陳請帶銷斷難邀准一經議駁轉致無從措手辦理必更
掣肘似不若再請展緩三箇月一面竭力催銷倘能銷完固屬
大妙否則限滿再行察看情形斟酌辦理似於公事較爲慎重
部中或不至以輕率援引格外苛求至文內措詞以簡要爲貴
但言連年積滯上年遲至十月以後始行奏銷新綱開徵過遲

加以天年亢旱商販裹足云云祇期言簡意該可以動聽不必過於煩瑣致占將來地步除於詳內批示用特由五百里函佈卽希另敘妥詳仍由五百里飛呈以便隨同月摺入奏統祈酌度辦理爲企至裁票減費乃探源之論但於丙子綱無濟應如何奏請之處應俟冬間本綱定奪次第辦理現在似非其時秋令正銷鹽暢旺之際務祈率同馬牧等趕緊嚴催俾官商不致延玩觀望是爲切要

致阿嘯珊

昨准熙臺將軍函開道廳因備防地方現招馬步勇士數百名多係游手難免無根之輩竊恐聚之不難將來散之不易而事

在急迫弟故不敢置喙惟祈密囑道廳寓防患於驅使之內庶免遺患於將來弟雖不曰卸篆而愚見所及不敢緘默附此密佈云云查熙臺將軍入覲伊邇所言具有閱歷亦同寅關切之深軍旅之事閣下向未經過招之易而散之難未可忽略其詞賊本無多昨經樹軍追剿獲勝人心已定尊處與各廳新募之勇留則口分難以久支散則人眾未易安插應如何妥爲消患之處務祈留意並卽日肫諭各屬體察情形悉心斟酌期於盡善未可留爲後患是爲至要現在籌兵籌餉諸事萬難加以時值大荒賑撫不易安得事事盡如人意萬一不能見諒畫蛇添足勢必更加受累此次熙帥派出旂綠兵丁奏明飭司籌銀

數萬兩司庫窘乏異常必俟稍有進款方能量爲籌解據稱曾囑尊處先行設法籌墊已設法呈解若干卽望密爲函示以便飭司遵照

致卓黼候

頃奉丹初星使函開解州鹽梟勾連刀匪約結饑民肆行劫掠放礮爲號大有明火持仗之意中秋後卽有其事時將一月情形益岌弟想州縣各官與民最親理宜銷患未萌若毫無見聞何異日在醉夢之中若有其事而不飛書以告於長官豈非坐視斯民之凋瘵喧嚷於不顧乎被災各屬錢糧敝處迭經飭司嚴札停止徵收茲據星使所聞尙有陽奉陰違暗中追比者亦

有謂下忙雖緩上忙仍須全徵者殊不知 諭旨所飭祇就上
半年已徵未繳司庫者催提全繳其實欠在民者未嘗明諭照
常徵收也 天語煌煌豈可稍違閣下有整躬率屬之責何可

任屬吏下殘民命上負 國恩萬一因徵比激成事變非獨州
縣咎無可諉卽閣下問心亦覺難安牧令各有賑務之重任郡
守大有督率之責成若事前絕不爲之佈置事發又不以一字
告知敝處此弟之所不可解者也時值大災惟晉爲甚又况四
鄰皆饑秦之蒲縣韓城豫之濟源修武可爲前鑒百計圖維尙
恐無術補救全仗監司守郡直牧諸公羣策羣力共挽時艱而
後上下之情通達官民之氣不隔方克有濟茲特先函奉詢務

祈隨事留心隨時留意如有似前項情事務必密爲函致弟處
以便有禁必止有令必行尊處如有爲難弟必格外體諒然弟
之馭州縣不得不寬猛兼施剛柔並濟假令敝處亦以含糊徇
隱爲政則晉禍恐在眉睫郡守牧令亦未必能獨安枕而無憂
也從前迭次札飭備荒救荒各條各屬有無實力奉行者並乞
密示見復爲感

復黃蘷臣

頃接手翰領悉種切解州鹽梟勾結刀匪滋事蔓延至虞鄉一
帶經麾下帶兵前往緝獲匪徒十餘名交縣懲辦其餘遂畏威
歛跡足見舉辦神速早遏亂萌殊深忭慰所留馬隊二十名駐

紮解州彈壓仍飭畧振江往虞鄉梭巡搜緝及預選百名交署
遊擊就近拏辦各節諒必審度悉協機宜弟未便遙爲掣肘第
思饑民之蠢動起於鹽梟鹽梟之肆惡恃乎刀匪刀匪搶刦本
其故智鹽梟不過蒙虎之皮耳饑民固識利害相隨而附和其
中祇因不能忍饑待斃以貪果腹於終朝法似難容情殊可憫
誠如麾下所云可恨復亦堪憐現在各屬請領賑款計已解到
飭地方官接口放給實心辦理毋得稍緩須臾人心應可稍定
倘此後遇有滋擾之處務望麾下將真止刀匪先實之法次再
按辦鹽梟若饑民則惟有撫綏使之畏法而已不可一律視之
也承殷殷軫念災黎因奉商及之責恙尙未全愈當此多事之

秋須趕緊延醫調治加意珍攝以圖速痊月餉所需卽當催司庫趕籌照發以副雅望

復丁穉璜

昨修無啟祇賀節禧頃奉惠函並另示種切迴環莊誦慚歎莫
名西蜀富庶殷繁甲於他省不期亦竟空虛至此今得執事維
持而整頓之究屬有爲之區定卜錦城之福山右大局決製實
不始於近年近又比歲不登艱困自更日甚省南一帶偏野饑
黎夏間已有不支之勢乃自夏徂秋通省均無透雨刻計報災
州縣已六十餘處之多應賑饑民約二百餘萬口以外僅恃京
餉二十萬兩及借撥天津海防經費十萬金不敷月餘之用此

外一無籌備日與頽叔礪舫諸君子仰屋興嗟計惟勸辦捐輸
以補官力之不足昨准部議不令赴外省收捐本地紳富在外
省者居多恒數年不回本籍又安能措此鉅款春間騶從道出
晉境目繫情形數月以來更非春時景象矣執事痼疾在抱而
於弟尤素叨關切定必有以教之釐捐萬不能裁值此饑年亦
乏整頓之法局務深賴世兄襄助井井有條竹報中當能詳述
一切也目濛不能自繕倩友肅楷奉復

復何小宋

前肅蕪函祇賀節禧頃展六月間惠翰弟抵晉四閱月天時人
事無不棘手焦心荒旱情形夏間已不能了乃天仍靳澤秋災

又成現計報災之區已六十餘處應賑之戶則三百餘萬口之
多帑藏維艱不敢放手開辦然災處太廣卽擇其必不可緩者
加以賑施約計非三四百萬金不能濟事所留京餉刻已所存
無多爲日方長不堪設想論者謂山右財富甲於天下捐輸可
得鉅資溯查厯辦普捐均不及六十萬况今曰情形又非從前
可比較之執事撫晉時遠不同矣萬目疚心補苴乏術此地方
之饑苦民則待賑孔急官則莫展一籌聽之不能辦之無術皆
實在情形也至應協西路餉項曰事追呼穎叔方伯竟因此被
劾去官事均出人意外晉藩一席後來者更視爲畏途矣下忙
錢糧可開徵者不過十數處此外毫無進款正不知今冬若何

支柱承示閩省情形亦屬自顧不遑方弟疏陳之日尙未聞閩之水災也奉批後乃知尊處之災與晉相仿各省同一艱難未必能以協濟時艱適際莫可柰何尙祈珍衛蓋躬臨頽馳切

復李中堂

二十九日晚奉二十三日賜書並大牘雪岩觀察捐款改銀萬五千兩急公好義可佩可欽此外又蒙諄囑樂山諸君子廣爲勸辦得有成數悉出仁施感佩曷其有極前蒙借撥十萬金旣承格外見原慨免償繳復於另款籌濟十四萬兩購糧運晉拯救災黎壽佛慈恩無邊無量山右旣憂無款又慮無糧儘十四萬之數購備運晉雖腳費甚鉅實亦不得不辦茲將省城糧價

斛合另紙錄呈卽乞查核昨奉廷寄准提江安糧米四萬石由尊處轉運獲鹿此項米石已收津倉未知何時可以起運津款所購之糧可否並求中堂派員代運獲鹿應出運費若干卽於雪岩及續捐款內動用此間已飭司迅派妥員於獲鹿設局接收轉運至部撥之款僅祇二十萬按照晉七豫三分派亦應得銀十四萬兩仰荷 皇仁之厚迭蒙鄰誼之隆慚感五中莫可言罄俟各屬應賑戶口查明卽擬據實奏報不敷之數甚鉅尙須呼籲陳准於各省急呼將伯庶得仰仗眾力多救生靈迭承垂卹多方晉中百官萬民感深再造除備牘復陳謝惓外謹此復叩勛綏不盡

致朱雲甫

頃晤楊秋臣軍門欣悉閣下康濟爲懷不忍三晉饑民坐斃於烈日之中由津栎運小米高粱各千石來晉以活垂斃之民並承許於凍河之前陸續轉運以二三十萬石爲率仰見大君子關心民瘼不以遠近異視不以飛輓憚勞晉民何幸逢此生佛大功大德無有量極五中感佩莫可名言尊處委員張敬熙尙未到晉昨奉李伯中堂咨文比卽飭賑局司事照料一切所有現運來之二千石米價腳價運價照算撥付銀兩山右正當嗷嗷待哺之時得此西江之水真如粟雨天上萬民方趨食之恐後焉有不通暢之理惟冀源源而來如源頭活水滔滔不絕則

全晉災黎生全可望皆出仁人之賜拜德豈有涯耶此後米價
均依尊處採辦原價及沿途運資照兌決不敢少有低昂請卽
放心辦運爲禱又前因籌賑之艱奏請開捐以資接濟昨淮部
咨祇令在本省勸辦而晉中富商大賈貿易外省者居多僅恃
本省紳富捐輸實難籌此鉅款擬再據情籲請必邀 俞允乃
得於各省開捐庶藉以濟晉中大局不至決裂閣下宏才濟世
偉略匡時而於敝處尤爲關垂殷殷將來吳中捐務尙當奏懇
大力勦助多捐一金則可多活一人之命生靈引領惟閣下垂
念焉幸甚禱甚

復李中堂

頃間奉讀八月初九手示敬聆種切范令到津卽承飭撥鉅款
感佩無有旣極直境亦有秋旱中堂先事豫防恩周庶類無難
登斯民於衽席之上邇來晉災則更不可言狀矣報災者六七
十州縣省南一路轉瞬數月必至有地無人言之傷心將來不
知作何景象近省數縣昨獲小雨二寸此後若得透雨或可藉
以種麥然天高氣爽恐已無復望矣江北之米不敢截留如冒
昧瀆陳必至大碰幸能允許亦實無此腳價尊慮極爲周詳鄙
人亦早知難而不敢萌此念也台民觀察與招商局試運雜糧
已飭賑局司事預備一切必令其糧本運腳均無虧折方可冀
源源而來三四年荒歉之餘辦糧固難辦捐亦難誠如尊諭查

晉中富商大賈貿易他省者居多僅恃在籍紳富捐助爲數無幾一月之後不得不再申前請若能允於各省勸捐庶可多救民命未審樞中能鑒晉中實在苦況否顙叔以微罪行浮夸氏之所快意晉中則少一賢而健者矣磬舫已派署藩篆再讀大咨欣悉雪岩觀察運米萬石赴津轉運晉中以解晉民倒懸之急益欽我中堂痾瘵斯民之至意無量頂禮諸君子康濟時艱晉中官民共深感戴

致溫味秋

再密啟者林顙叔方伯被議去任弟前以湘陰周內太甚不得不以引咎私衷瀆陳天聽並非有所袒於顙叔也惟自四月

受篆以來接見屬寮詳察民隱冀集思而廣益賴叔臂助之力
居多查晉中吏治之壞非一日矣華帥過於寬恕以致屬員恣
肆閭閻之疾苦壅不上聞胥吏之追呼迫之已久小民日受流
離轉徙之苦而爲牧令者方且肆無忌憚不顧斯民之肥瘠但
求私橐之充盈不恤下民之怨咨但伺長官之喜怒間有以愛
民爲己任者且以他事去官矣想久在洞鑒之中無俟弟之贅
述也賴叔去冬莅任首黜貪污以肅吏治然承積弊之俗上卽
嚴爲區別下偏工於趨避賴叔不避仇怨不挾偏私黜陟一
秉乎大公考察不遺乎至細今夏以來吏乃畏威民益懷德雖
值饑饉薦臻之歲餓莩載道甘瀕於死而不敢爲怨詞固我

盛朝深仁厚澤浹髓渝肌之所以而穎叔馭吏安民之苦心不可謂非有造於晉也自被議去官晉民之號泣請留者日以千計弟惟穎叔之去晉也既格於例而愛莫能留而晉民之請留穎叔也又出於誠而情不忍拂展轉思維與其恝置而聽輿情之壅孰若宛轉而伸將伯之呼謹將士紳請留公呈上呈台覽敝處礙於成例不敢代奏惟念晉中正值賑捐孔殷之時穎叔以諳練之員素愜蒼赤之望晉中官吏畏愛尤深該士紳所呈可否由尊處密商子禾侍郎及眾位京秩諸賢另行設法達宸聰之處出自鴻裁或奏留穎叔辦理晉中賑務於部議似無大礙而在晉民得遂遮道請留之私寇公之借不無小補閣下

念切珂鄉此事於穎叔一人之去留原屬甚小而關係晉中億萬饑民之性命則甚鉅伏惟大儒密商裁察

復蕭杞山

迭荷賜函比經裁復諒邀垂覽頃接初十日手書敬承一一晉中窘況日甚一日前奏請推廣捐輸昨荷天恩撥給江鄂漕米五萬石又益以山東漕米八萬石統計轉運之費非五六十萬兩不能到岸擬請撥借山東庫存餘款六十萬兩分作六年歸還以資周轉並附片請加撥江鄂漕米六萬石又於兩淮鹽票籌助捐款以爲來春接續賑濟之資非敢恩外乞恩實迫於時勢之不得不然也此間得丹初星使周厯災區不惟賑務大

有裨益且使朋比取巧之徒有所顧忌吏治或可藉以整頓弟
前派員往迎丹翁一切從簡祇留巡捕七什各一名以供奔走
餘俱速令回省應用經費亦寄存府庫以作賑資琴鶴清風先
已吏畏而民懷矣弟於晉民全活甚少全賴各省大君子將伯
之助權濟目前謬承嘉許期望慚悚無地惟有與丹初星使和
衷共濟實力虛心以期補救於萬一耳敝處奏請之件甚盼仰
邀 俞允方可以維繫民心否則晉事不可救藥矣全望師門
默靈苦衷實所厚幸

復劉峴帥

九月十八日奉七月念日手書祇聆種切承示前懇代籌西餉

一層倣處已奉部咨早作罷論九月初復以晉災綦重需款甚
繁疏懇於各省勸辦捐輸以資挹注當於發摺後謹具函牘奉
懇慈施派員勸辦現已仰蒙 恩旨允准粵中地大物博好行
其德之十甚多執事恩信久孚必能仰體仙佛仁慈踴躍輸助
南雲翹首企禱莫名交至以來窮黎饑塞交迫流離餓斃更甚
於前奉撥米銀均以災區太多一到卽分佈罄盡冬賑固虞不
給春撫更慮無資合肥相國深悉賑費之難籌災黎之可憫以
爲功德之大莫過於援救此次晉中之災代勸浙紳胡雪岩諸
君交相助嗣後聞風而興起者亦不乏人並有故隱其名及
不肯邀 奨叙者亦謂災荒之重固屬無過於斯而善士仁人

勇於救災恤難莫甚於此次惟究苦於棉薄津滬兩處共得十數萬金續捐能有若干殊難懸揣粵中局面開闊海關等處奇士尤多務祈執事慨念數百萬生靈待哺嗷嗷能多措捐款數十萬金卽多活災民數十萬命積功積德無旣無涯與尋常輸助不同非細小善舉可比如夙懷善願未得善緣則以之捐賑晉災實勝泛泛功德萬倍執事慈祥惻怛必樂援手於雲天惟冀大發慈悲一面切囑所派承辦之員廣爲切勸西河蒼赤啞結同深

致沈幼丹

九月二十五月初十奉布兩函均以晉賑需款甚繁需用孔

迫請費心於兩淮鹽票設法捐輸接濟計程已度典籤晉中仰
望各省捐輸情逾望歲現在司庫一空如洗而災區之請發賑
款者幾無虛日饑黎啼號情狀令人耳不忍聞目不忍覩奉撥
漕米固由道路太遠不能迅速前來亦由運費不支未獲踴躍
挽運無款之苦因以無糧數百萬哀鴻環泣哀求冬臘兩月之
艱難實不堪以設想因思仰蒙垂愛時時軫念晉災旣於各處
設局勸捐勸辦諸君好善之士必能仰體此日之仁慈平時之
恩信爭先輸助拯此奇災惟鹽捐商捐均非寬以時日不可而
山右情形緊迫冬賑春撫時時有中輟之虞非叩求仙佛迅賜
逾格之施莫救燃眉之急不論捐款有無成數擬請先於別項

存儲款內或稍可暫緩撥解款中借撥銀十萬兩趕於年內匯寄晉中或迅賜委員惠解過此一關窮黎便有生路積功積德無既無涯至挪借之銀卽以捐款陸續劃收固不敢歸於無著亦不致日久稽遲實以處此山盡水窮不得不懨情奉懇夙蒙關愛惟冀玉成冒昧再三臨額曷勝悚感之至

致崇地山

晉省本年之旱實從來未有之災其閭閻饑苦情形銀米艱難景況屢經縷晰疏達大君子洞察在抱關懷天下蒼生度邀洞鑒本境無糧無款力量不能自全迭沐 聖恩分頒銀米無奈災區太廣爲日方長雖渥荷乎 皇仁仍不敷乎分佈更且晉

地不通水路領運奉撥漕石以及分赴外省採買各糧數千里
挽輸運費多於糧價統計成災八十餘廳州縣災黎至七八百
萬口之多賑至來歲麥收非數百萬金所能濟事如此奇災大
厄實足駭人聽聞前以不得已籲懇於各省勸辦捐輸以冀眾
擎易舉幸賴諸仁賢不分畛域協力扶持且有首先解囊捐廉
以爲之倡者 朝恩鄰誼至渥至優伏思奉天富商輻輳之區
產糧最多之處地大物博不乏好行其德之人大君子恩信久
孚倘蒙派員作登高之呼定卜萬山皆應較之他處尤易爲功
除備牘咨請援手雲天憲乞派員勸辦外用特專函奉布夙欽
慈祥惻怛在遠不遺際此數百萬生靈待哺嗷嗷定荷矜憐於

格外抑弟更有請者秋間派委候補知縣張令銘勳赴奉採買糧石攜資有限購辦不多現屆封河不及再運災區望糧甚切若不及早在奉購定固俟開河後起運前來春賑必致中輟而此間庫空如洗實無鉅款可匯奉天錯此時光又慮緩不濟急再三籌計殊乏良圖現蒙鼎力勸辦捐輸各捐戶仰體仁慈必臻踴躍務祈俯賜變通辦理先行借撥銀兩預將糧石指定俾開凍即可起運晉中挪借之銀或於將來所收捐款中劃還或匯兌由晉省交清如此一轉移間晉民蒙福無量大君子具匡濟時艱之略遇事達變通權欽仰素深用敢冒瀆統祈鑒察臨頽曷勝禱切悚切之至

致劉峴帥

月前奉布一函昨由志誠信交到手翰並銀一千兩當卽肅復
交該號回呈荷鶴俸之慨分拯鴻哀於垂斃恤鄰誼篤仰佩靡
涯前書奉懇俯念晉艱派員代勸捐輸接濟仁心仁術必荷玉
成山右仰望各省捐款之殷情逾望歲現在司庫一空如洗災
區之請賑者緊迫萬分四境啼饑號寒令人耳不忍聞目不忍
覩奉撥江廣漕米固由道途太遠不能迅速前來亦由運費不
支不克踴躍挽運無款之苦因以無糧冬深春初時虞不繼際
此山盡水窮之會不得不作無厭無已之求夙欽執事畛域不
分力顧大局無論捐款有無成數仰懇慈施格外先於別項存

儲款內或稍可暫緩撥解款中借撥銀四五萬金能於年內匯寄晉中固屬佩德無量否則開春見寄俾開河後得有轉運糧米之資沐荷矜全三晉咸深感佩至奉借之款將來卽於捐款中收還歸款數月轉移全活災黎無數痼疾在抱定能諒弟苦衷援手於雲天之上也

復朱翼甫

日昨奉復寸函計邀雅照頃接十八日手翰祇謐台從卽日起身赴獲照料一切聞之欣忭莫名保泊兩處起運各糧共計兩萬八百二十石指日均可陸續抵鹿並於華裕借錢五千串文行營糧臺借銀二萬兩以濟晉中運費之不足具見勇於拯救

晉災仰佩無既寄來糧價運費清單除頭二批自與晉商交易
暨第三批當閣下在此時算明第四批由任倅帶來清賬均照
數咨由天津劃付外統計尙應找付小麥小米膏粱三項共四
千石價腳銀一萬五千五百兩刻卽如數咨請伯相轉飭照發
至此後續運價腳核計存津之款雖不甚多而各省之捐均咨
明匯交津局卽所借山東之款兩淮鹽務票捐等銀亦皆請交
天津歸總此後收數正鉅應仍在津劃撥以省匯兌之煩刻已
咨商伯相並函託樂山召民諸君子請其設有不敷先於津庫
墊發江廣漕五萬石已有三萬石到津其二萬石旣已購齊當
亦可於封海前起運現查各糧之到什貼者固甚有限其到獲

者亦尙不多獲局運費已充遞運可期迅速務祈轉託直境承
運各員迅將起運在途者趕緊挽運晉中祇嫌糧少不患糧多
能速來能多來災民蒙福無量諸事均請酌度籌辦感禱萬分
至前書以平糶改採辦一層既多窒礙難行亦不必另改名目
弟批雲林之稟米之來源有三第一條卽商米與閣下前信所
指者相同第二條乃代辦之米也總之晉省祇期有糧到不論
名目要以順遠商之情爲主乞放心再二次奉撥江廣漕六萬
石擬先派人於年內籌墊銀兩趕赴牛莊陸續採購以備開凍
起運並預籌凍河後陸續轉運平糶米糧暨招覓車行用車轉
運各節均極周備之至全省望糧正切腳價稍貴亦不能因此

致誤急需統祈議從其長事求其速賢昆仲大才廣運必無不合機宜佩甚感甚晉省無不惟命是遵統求放心切不可聞人之浮言而阻滯事機反致多餓莩耳拜託拜託

致李中堂

日前肅復寸函計邀垂照昨今迭奉大咨祇稔保泊兩處前後起運平糴糧統共二萬八百二十石又酌借朱道銀二萬兩接濟獲鹿運費并陘山路就近派委朱道估修並於江蘇海運船商籌捐鉅數種種慈施格外聞之感戴莫名茲據朱道開來估價清單應發給銀一萬五千五百兩已另牘咨請飭卽照發朱道恐存津之款尙有應發漕項運腳等急需以後糴糧價值擬

卽在晉支付晉庫一空如洗本地捐款議明由該州縣報明數目卽留作該處賑濟之資並不解交司庫其外省之捐及山東借款並兩淮鹽捐亦均咨明全行解津彙總本省一無收款且往還匯兌匯費折耗種種喫虧似不如仍由津門劃撥爲便惟各捐款一時未必交齊東省所借之銀恐亦須分批解到幼丹制府兩淮鹽捐之款未知何時可到天津而朱道兄弟糴糧價腳未便久延不得不求中堂援手務祈檄飭召民如晉中存銀目下不敷支放請先於津關道庫墊發以應然眉墊發若干不論何處捐款借款儘先到津者扣還津庫如此通融轉移則晉中叨光不淺然非蒙中堂仁愛之隆斷不敢作此千冒之請

謹另備公牘咨請轉飭施行臨穎曷勝慚悚之至頃接清卿太
史來信十八日已抵臨清因知晉中已於東陽關設局擬將督
運之八千石仍由道口趕運清化其第二批小麥高粱酌量由
臨清分運蘇漕轉達東陽分爲兩路並進發信之日尙以臨清
軍戶稀少派人四處招徠尙議而未定此間前已有信知照請
其全數先運清化俟明年再運東陽想中堂咨行已有一分與
吳太史矣刻中又飛函與商如悉運清化更妙恰符中堂所示
辦理不至差池如二批業經定規開行自當迅卽派員星夜趕
赴東陽接運知關壅注用以附陳

復吳清卿

前接滄州途次手教當卽祇復連日正深翹盼二十五日二鼓奉十八日惠書祇稔驕從已抵臨清仰企福星旣慰且念分運東陽一節因前奉伯相書有擬緩至明春再辦之議是以委員未到而改令往平陽但派張牧彬趨赴清化設局恭迓台旌前書陳明諒尙未達覽也今以東陽業經派員致勞中途籌計奉書心切不安抱歉萬狀臨清僱覓車輛日來有無端倪如果無車自必恐運清化深恐礙於旣在東陽設局必思分運若干因此多費周章計議未定用特專函飛布務請執事祇諭由何處轉運最爲便易卽由何處前進不必以晉中之設局爲慮也能仍悉運清化張牧已在彼接收固屬大妙且李中堂云此路比

東陽關更近幾站如此信到時尊處已將續到之高粱小麥車
運蘇曹晉中一接賜示已飛飭東陽關釐卡委員先行照料飛
速派員赴東陽祇候核計彼此程期亦尙不致違誤千萬弗又
追返一再耽延定議如何統乞飛示盼切望切豫中轉運已派
潘莘芝觀察經營在道口設局弟亦已函致請俟執事到後諸
事託其招呼未識執事已否得信莘芝精明勤幹晤商必臻妥
善也

致夏子松

晉中旱象慘不可言昨丹初星使進城談及省南一路平蒲各
屬餓莩塞途屍橫徧野甚至人食人肉言之心傷聞之淚下弟

以軏材逢茲大祲薪勞無補焦灼徒深前請續撥江鄂漕米六萬石竟奉部駁又請借撥東省存款六十萬兩據東省來函祇允十萬撫此八十餘廳州縣災區之廣卽使所請皆邀允准尙屬不敷甚鉅矧部議如此鄰封如彼更覺無可措手夙欽執事憂樂關懷饑溺由己用敢縷陳左右惟冀惠錫箴言俾有持循是三晉生靈之厚幸也

復崔季芬

頃接初九日專差送來手書具悉王鳳池黨匪在蒲桃峪抗拒官兵所至焚殺擄掠凶焰日張匪眾共七百餘人以青龍洞爲巢穴麾下分兵三路並函會晉省防軍杜其旁竄該匪現復焚

毀蒲桃峪竄至蠶平等因弟前接澤州府稟函慮其竄入晉境已派撥練軍馬隊分飭鳳臺臨川等縣各率防勇扼禁巡防頃接來書復添派練軍步隊前往扼禁但非十日不能到防本年晉豫兩省年歲荒旱饑民因饑滋事無處無之原其起事之由不盡民之無良實緣饑餓所迫情實可憐是以晉省遇有此等事件如果實係教匪會匪則捕拏首犯立正典刑一面解散脇從妄爲賑撫不肯指饑民爲匪類冀免妄殺無辜事易了結此晉中之辦法數月來饑民徧野而尙稱平安職是之故王鳳池首犯已獲餘黨亟應設法撫綏俾免挺而走險滋蔓難圖茲旣特嚴抗拒官兵自不能不先行勒捕第饑民徧地皆是若專恃

兵威而不加賑恤恐麾下不但有誅不勝誅防不勝防之慮且
恐將來之議於後者不能爲麾下諒也鄙意應由麾下一面設
法擒獲魁渠一面知照省城撫藩諸君子趕緊妥爲安撫庶不
致釀成事端貽害日後弟與麾下叨在同官敢爲從直布臆至
敝境現已派兵扼要設防布置周密但祇能自守邊疆不敢越
境一步蓋以此股匪徒大半因饑所迫祇須尊處能卽趕緊查
辦不使擾及晉邊素性不肯輕以鄰封之事奉行入奏貽累同
舟請不必過慮也近日彼處如何情形麾下已否知照省城請
卽妥爲賑撫解散被脇饑民統祈示復爲盼

復丁樂山

前日奉布一函未識何日達覽頃奉二十三日手翰具稔種切
汀鄂漕五萬石除吳太史帶運外又起運小麥糙米兩萬三百
石又於平糶項內先撥高梁一萬五千七百石具見拯救晉災
之切仰佩之至朱唐二君以此次所辦漕米小麥賠累過多無
怪其不甚情願現在晉中賑糧悉賴其墊辦勢亦不能用意計
較則丞云粵商亦願代辦平糶召民觀察擬給予五釐利似不
足以招徠已由鼎丞函商召翁辦理倘能有成則晉中又多一
濟糧生路矣清卿太史二十一日抵館陶以續運之小麥六千
石由蘇曹運東陽關並信致津局請再撥三四千石趕緊續運
未知津局如何定議東漕銀糧一事崧子蕃觀察亦有信來僅

允借銀十萬斷不敢用蒙伯相已爲切函代達當可望其加增
前聞閣下不能暫離天津正在無法可施今蒙伯相允准得信
快忭莫名一切統求鼎力籌辦弟處無不一一遵行需用布袋
應如何預先籌備之處亦求大力酌奪總之晉事非仰仗伯相
暨閣下與召翁諸仁賢格外玉成扶持斷不能有今日弟惟望
雲翹首感謝仁施一切均求隨時代酌代定必無不臻妥善也
續請江廣六萬石刻已援到奉駁之文能否再請尙未定奪數
百萬生靈所繫不患其碰破頭面患不能邀朝廷之渝尤未
知另有生路否也

復閻丹初

日前覲旌桂止快領塵談語我以至德要道治術學術靡不贍
賅弟微窺其奧蘊斷之曰本顏曾思孟之道擴濂洛關閩之學
行管商申韓之術用起剪頗牧之法精神之運量捷於風電宏
度之包涵煦於陽春似猶不足以形容不顯篤恭之妙吾不知
其名字之曰道強爲之名曰大當今天下非公孰克當此而無
忝也乎匆匆送別戀戀依馳頃奉手函辱承謬獎過情並以薄
物之微荷蒙齒及雒誦數過益切汗顏祇稔騶從稽察徐祁武
沁各區糧價民情尙稱平順該處受災本不甚重由此而達澤
屬未識情形何如鳳臺陽城據稟災重而饑民最多吳清卿太
史督運捐集糧七千石又江廣漕四千石本擬賑散南路現以

澤屬需糧孔急函致請以漕米四千石留賑鳳臺陽城以七千石運平陽由清翁自行酌奪分派蒲解等處以後續有運到並由臨清蘇曹轉運東陽關者亦均全數運交平陽再行分派已有麥子四千石起運前來津門之糧現仍定分爲三路並進清化東陽兩局所收均擬運至平陽歸總獲鹿所收如能較旺大可分運南路惟三處運費甚鉅司庫僅存數千金祇可俟部款到來趕爲接濟三處總須七八萬金馬牧稟來請款請米已批准於部款中提銀五萬兩經解運城由執事分撥馬牧所辦各事均甚妥善趙守採買正陽關糧及與張王諸君合力籌辦弟悉唯尊命是從請定計後卽行示悉程汝濤已補陽高任姓者

大約卽偏關任令閻兩君似應以程爲最來書謂任令才難任
繁尤仰品題至當續請江廣漕八萬石已奉部駁正擬借重台
銜再請至東款至今未接式岩復書惟據崧觀察來函則云擬
於糧道庫借銀十萬兩日昨弟又分別致書總恐不能如數全
仗鼎言希冀可以多得靜菴先生信已遞交矣弟日來目紅手
顫情友繕楷伏惟諒宥

復李靜山

頃誦一月朔日手函藉聆一一晉中鴻噭徧野流離死亡慘不
可言以理論之自當剝極而復然冬令愆陽春麥播種已是無
望未審來年何日方有轉機風警之占卓見據日而言爲北爲

水自是確論但願得如尊課所云爲變不大則國家之福也承爲辱軀代卜費心之至二課皆在半吉之間居易以俟命盡其力之所得爲以期無疚於心他非所計也自來望氣最難惟深明其奧者占候乃能有驗乾兒藏煞震坎多慘應主西北邊功東北災歉其明徵矣坤離將相之氣現在江皖人才極盛其在斯乎抑將別有所驗也大元空五行原從奇門而出閣下旣探青囊之祕從此山川對待之形陰陽交媾之妙了然於心自了然於目所謂百里江山一晌間仁弟今日之謂也吉卜得雙龍合氣已合貴格脈奇穴正則尤不可多得青囊千言萬語祇要入首一節來脈清純合格穴情明白收得生氣出得煞氣卽

爲眞結至於護砂培補古人多有用力爲之者但箇中之妙用在一因字不可過用人力致失造化自然之妙高明以爲何如

致丁雨生

前布寸函縷述晉中災情並需款需糧之切敬謝高誼代勸粵捐屈計郵程早登籤閣兄籌賑半載悉仗仁鄰協濟扶持勉度殘冬實爲深幸惟冬賑雖勉強敷衍而春賑更緊要萬分款固一無來源糧更倍形不繼災區八十餘處紛紛環求覩此瘡痍傷心慘目查自上年夏秋開賑所需賑糶糧石均由津門轉運前來於今年仰承合肥伯相鼎力維持墊款代運歲底清算

計墊銀二十餘萬兩之多災黎寒冬無缺食之虞全仗伯相慈
施格外目下各屬望糧更切所有續撥江廣漕六萬石年內購
定津奉等處雜糧並各路善士捐集糧石亦約十萬石有奇早
已運抵津門津晉往返函商均苦無資開運雖尙承伯相允爲
設法核計爲數過多即使湊借騰挪亦不過分起開運糧石遲
到一日災黎卽餓斃甚多熟計苦思竟無良策惟有仰求閣下
迅將捐款早日匯解並由輪船逕寄津門以冀可以速達並求
於粵中督撫前代達繩情請將窖冬奏准借撥之六萬兩趕於
二月內如數逕解津局收兌俾在津待運糧石得以速卽轉運
晉中不獨兄感佩靡涯卽伯相仰仗鼎力得此鉅款運資亦荷

雲情於無既矣

復朱翼甫

頃間連辰兩函備悉壹是承示原借李爵中堂湘平銀二萬兩
係爲閣下自行接運糶糧至什貼之需並非借墊晉省腳價應
仍自行經理屆時扣繳一節昨准爵相來咨當經札飭張守將
收過錢二千串如數送還閣下以符原議而免轉轄獲局運費
已敷脚甚踴躍江廣漕糧五萬石早由天津起運完竣獲鹿僅
收五千餘石均經隨到隨運腳多糧少已有停腳待運之勢而
各屬饑黎望糧甚於望歲不知何日可以到口尙祈函致後路
務望催運前進此項漕糧早達晉南一日即可多救無數民命

至承閣下先後採買各色糧二萬零三百石計共合銀七萬六
千二百一十兩均經查照單開咨請爵相在於天津存款如數
劃撥已經獲鹿局收到糧一萬七千七十八石尙有未到糧三
千二百二十二石芝田別駕到省代述一切自係因令兄奉爵
相面諭現在天津無有現銀起見非有現銀不可再辦所慮誠
是但以前代辦各糧旣已如數清楚而承辦之漕糧浙江奏明
撥交令兄銀十萬兩湖北四萬兩江西亦均撥發清楚目前晉
省雖存天津款項不多而各處捐輸見諸文報陸續解津者已
不下六七萬兩將來鹽捐一項更屬大宗是代山西辦糧之銀
斷不至於落空也承賢昆仲竭力効勦自應仍請放手辦理始

終全活晉民一俟接准餉相公牘即可照發或糧到獲鹿亦可
照發天津有款則在天津劃扣兌發天津無存則由此間設法
借撥無論如何爲難決不至令賢昆仲受累日昨領來部款分
撥各局運費撥解河東節轅及點綴各郡災區賑資到手卽罄
固已無可騰挪如尊處刻有急需自可在於天津想方但非餉
相之咨文不可且非有平糶之糧米卽日到獲不便函咨餉相
發銀至於糧到或仍交張守轉運或由閣下自運均無不可但
由什貼扣還奇零之數未易湊集成款且恐多費周折想閣下
高明必以爲然

復閻丹初

前日發第八號信二十三夜二十四早二十五夜連奉五號六號七號賜書知所責各函次第達覽卽謹福星安抵運城諸凡擘畫運用如神三晉羣黎咸有再生之慶惟蓋勞太甚思慮過周以致清恙觸發殊抱不安尙冀隨時珍衛柱石之身上副朝廷之倚畀下慰中外之仰望是所叩禱謹將應對各事宜登復於後

一聽菴觀察匹馬先赴周口獨任其勞令人欽佩副以趙湘林又得王守恭有用之才李鈞富而安分皆不易得此路得人而理事必有濟

一讀會立同善堂書剴切詳明具徵苦心此令一出隨聲而應

者三萬金後必接踵而至可見仁言入人之深省城官僚莫不欽佩

一山東借款復奏祇允十萬兩經合肥相國函商請益復增借銀八萬兩意欲以十五萬指作運費僅以三萬金應酬大疏買糧之需合肥相國以爲太少此係得諸保定來信雖未據東省明文然再加增必不可望多兩萬也第四次肅書求式帥至今未蒙一字賜覆人在窮處顏色本低不足怪也

一清卿太史帶運江廣漕糧四千石至清化因議就近分撥鳳陽兩縣其高粱七千石係清卿自行集資購買運赴災區察看情形散放何處地方最苦卽在何處散放屢經函告平蒲絳解

最苦矣弟處未便指定者以清卿太史自有主張不得不以客禮相待耳

一鼎臣於二十一日起程往山東全憑三寸舌以求隨漕輕賚貼補運道口以上陸路而已

一未成災各屬錢糧儘數徵齊亦不過十萬兩無論如何節省年內必不可少之款亦須三十餘萬兩勉強拖欠敷衍殘年開印以後又是水盡山窮弟到處函借百無一應可見沿門託鉢之難然弟哀求苦告總是嘵嘵不休縱彼厭我固所不辭但怕全不理會而已冬撥之奏雖屬創始但事已至此無論或應或不應除却呼籲於君父別無良法

一接川省司道來信官商並捐約可得三萬餘兩立齋方伯由
晉起家聞蜀藩自然之利尙好得我公一言必當有以報命也
特恐其手筆不大耳

一省門近日冷甚據云更甚於往年幾次作勢飛雪然鋪地不
滿半寸各屬報均在一二寸之內三寸則少藐躬涼德不足以
召祥霆慚愧曷極

一昨解河東五萬兩尊意先儘買糧其計甚善總之我輩但求
可以救民費力所不惜也况公力量心思勝荃十倍地方人才
極爲熟悉一切均聽鈞命施行

一榮河王令已飭藩司撤委卽委馬鑑就近接署晉章撤缺向

用酌委此時爲地擇人伺暇計及此層

一札調進省者僅太平劉紳篤康鶴亭日久未至昨復札催頃已飛飭該紳就近前赴運城祇聽訓示此外未嘗札調一有錢之人惟羅訏庭觀察交到于禾閣學開來一單十三人其中無一富者大率正派可以辦事訏庭晤對之際當必回明也一訏庭二十一日到省晤談兩次語語中肯脚脚踏實令人欽佩之至二十四日恭詣行轅李菊圃王星橋據云明日到省

一昨飭籌餉局解銀四千兩以備雜支之需各員薪水理宜從寬支放要人出力未便再要人賠錢况大半寒士純儒居多我公必有一番處置請勿慮其缺乏隨時呈解不誤

一江廣漕糧由蘇曹來者六千石次第抵東陽到獲鹿運什貼者亦六千石飛催趕運平陽由省局先擇無倉穀之處分撥昨接天津來信後起運蘇曹者八千石運獲鹿者二萬餘石均因河凍船不能行催覓數百人敲冰上駛如再不得舟行改用陸運前進種種阻滯不知老天何阨晉民之甚也

一錢糧停徵米豆與之俱停賑米已屬萬分難籌又須兼籌旗綠營兵米現飭趕提北路歷年節省米豆而陳陳相因早無汁漿可敵矣搭配採辦之米四六分放免滋兵閑

一會奏續撥江廣漕米六萬石各省借款五十萬兩均荷天恩允准感激欲涕但祝各省疆吏大發慈悲格外通融庶晉民

直隸志書卷之二
稍有生機弟已切實函求不識能有一半應手否謹一一拉雜
瀆聽尙祈隨時賜教爲幸至盼至禱

復龍芝生

再誦另示並讀救荒事宜仰見執事憂樂關懷饑溺由己本湛
深之經術酌變通於時宜偉論宏猷莫名欽佩賑給分別極貧
次貧極貧者任以轉運次貧者資之貿遷既免飛輓之勞更得
周轉之利法孰有良於此者惟晉民儉以自奉則有餘自食其
力則不足平日怠惰苟安卽貧戶亦必蓄養驢頭以代人力求
其能肩挑背負者什不得一以故一遇災歉束手待斃前因獲
鹿轉運山徑崎嶇車載不便曾議用彼地之民以運彼地之糧

招之旬日竟未有一人應募者不得已仍用驢頭駝載此以運代賑之難也夫極貧者既不能自食其力又不能聽其坐斃則不得不賑者勢也次貧者見極貧之戶逸而獲食又誰肯持官給之票以謀升合之利耶且次貧之戶亦非盡能貿易之人其巧者或足以周轉其拙者竟至於立罄亦事勢之無可如何鄙意於極貧次貧者則賑以銀米中戶無糧者則平糶以濟其窮明知爲日甚長勢有難繼亦唯盡其力之得爲與其事之可行者而已矣平糶難於購糧尤難於籌款晉省連年亢旱殷富之家平日各濟各村力已難支此次捐輸已成弩末昔年借款尙多未還欲於旦夕之間動借數十萬鉅款明者早知其難固無

俟鄙人之贅說也現在東路轉運以由奉天上海采購者運至
津析於津析設轉運總局由津析轉運於晉中之獲鹿設局接
收轉運什貼然後由什貼分濟以達於平蒲各郡南路轉運一
由道口清化一路入翼城一由蘇曹入東陽關於東陽關設局
接收轉運分撥絳解各郡丹帥委用本地公正紳士往賒旅店
周家口正陽關三河尖分路采運攜資無多未能多購近幸各
路客商頗有源源而來者糧價稍平權濟目前承示運則任商
糴則任紳成本之虧欠則任之於官此不易之定理除已行數
條外其餘未行各條容再函商丹帥妥議舉行惟晉中無貞之
才與有貞之才同形缺乏有良法少治人仍恐與弊法同尙祈

不遺在遠頻錫良箴俾有持循是所厚幸

致李眉生

十三年冬李雨帥處匆匆一談未及暢申積愫至今歉然回憶
裘葛之迭更彌覺滄桑之可感非復壬戌癸亥甲子一往直前
兩情並茂將欲撥亂世而反之正也公以尺蠖蟄伏遂成千古
不朽之文章我以畫蛇多添墮落九淵無底之孽障爲貧而仕
旣仕而債臺益增因病求閒得閒而羈絆難脫馳驅就道滿目
瘡痍竭蹶不遑莫蘇餓莩蓋自夏徂秋以至冬臘晉民之因饑
而斃者不知幾十萬人矣非不肖推而內之溝中如親手以挺
與刃而刺之以卽於死亡其孰信之得雪三四次每次不及一

寸明年春麥已無可望非第全晉之憂亦未爲大局之福萬方同慨吾道又將安之公身寄江湖心存廊廟想亦日以此惴惴於懷穎叔能詩亦復能官仰仗佛力拔出苦海竊恐我輩去官尙不能如彼之脫然事外不肖始則爲之辨白是非繼又欣羨其速登道岸勞逸之趣旣殊苦樂因之而判況吾輩所以自豪於茲世者固在彼而不在此乎劫剛思精學博爲門第所繫累不得不岀頭露面上繼芳踪未久亦必捉將官裏去不肖之期望此子與公所獎許者同究之一在天而在淵以劫爲之雖不如世俗之墜於淵然有妨於躋天之業甚多功虧一簣迥別仙凡若再住京兩三年雖非其志之所存而無窮之閱歷百世

之宏量實基乎此我公以爲然否兩目昏花不能成字情友繕
陳鵠盼惠答慰我素心

復葆芝岑

再誦另牘備悉閩中一切情狀亦屬最難展措之局時事多艱
良用浩歎山右冬賑敷衍尙稱一律民心亦甚靜謐得雪三四
次均僅盈寸土膏未見深透若得春澤補渥二麥方有生機惟
刻下河凍未開江廣山東所撥賑糧旣難轉運前來運費亦極
難措辦春賑尤覺喫緊李伯相在津庫節次代墊解銀已逾二
十萬有奇尙未歸還所望祇奏准借撥各省之五十萬兩稍資
接濟以外再無他計可圖然屢次致書催促尙無響應遠水近

火令人昕夕難安惟望大才槃槃早一日履新俾弟早釋一分
仔肩曷勝翹切之至

復德曉峯

魚函往復如接芳儀頃奉手函領悉種切晉省捐務亦業已開
局道府州縣以及京外正雜各項均奏准稍爲變通仿照黔捐
章程非不欲善價而沽實因時勢窮蹙萬不能不權作救急之
計以顧目前惟翎枝一項部議綦重不得酌減貴省如俟有定
議務望詳爲示悉爲禱去冬賑政辦理尙稱一律敷衍地方亦
尙靜謐刻下各省所撥賑糧水陸挽運計非百萬金之費難望
達晉司庫久已如洗而重以兵餉練餉及各項雜支均不能不

隨時點綴置之弗顧左右支絀無從措手凡一切糾合四方之
精銳盡成弩末彼此同病相憐恐盲痼之深兄所處更有甚焉
者客臘得雪省北差厚餘皆不過一二三寸殊未深透現率同
城各官步禱雨澤未審可邀上蒞之恩眷否倘再無轉機時局
不堪設想冰如方伯竟歸道山一場春夢終被阿婆道著陶淵
明歸去來辭每令人讀之不忍釋手不審素心人亦可有同慨
否

致葆芝岑

山西客冬得雪旣未深透現又雨澤衍期祈禱不應春麥未能
下種省南之民餓斃日甚一日目擊情傷無計可設昨欽奉

諭旨從庫款撥給河南山西賑濟銀二十萬兩本年南漕十六
萬石 皇仁軫念災黎優渥已極第前此奉撥各省漕糧尙因
運費莫籌遲滯不能達晉後此一切轉運空拳求飽益覺節節
爲難而重以省北歸包一帶馬賊游勇勾結饑民時復蠢動雖
屢經調營撲剿殲其正兇而兵餉所需更不能一刻停其支發
左右窘迫令其寢饋難安惟冀早移台旆共救時艱俾弟多承
扶翼少釋仔肩不勝翹企之至

復徐壽衡

誦去臘十九日黃邨手書現宰官身說無上乘真令頑石點頭
弟自詣祇樹園以來日在夢幻泡影之中而不自覺惟以忍辱

託鉢爲業不書當頭棒喝令人大夢初醒所謂以法彌劫是謂
劫劫光得我佛三昧真印非空一切法一切劫焉能於億萬劫
劫中現此頂上圓覺光明竊聞尼山至教早歎博施濟眾堯舜
猶病若非欲立欲達數語現身說法恐恆河沙數塵劫往還我
佛雖有無量慈悲無量法力亦不能使大千世界齊登歡喜彼
岸由定靜以證圓果實萬化之根源凡事動則紛紛則擾一戒
侈談宏功二戒自夸虛願惟念念返諸淨光明地事事求諸香
味色聲庶稍補於眾生若云造千百萬級浮圖種無量功德則
何敢望惟有自安吾螻蟻之微仁而已請以質之最上無量壽
佛於意何云

復凌問樵

頃誦去職十三日手書藉悉種種准綱各票湊捐聞祇在十萬之數酌加體恤誠因鹽利微薄不得不然且聞豫省亦有於各岸捐助之請則勢力已分得半之數亦意中事也沈制軍及崇如都轉處再三函託諒不聽慳吝者之漠視湘中捐款已得萬金皆閣下及諸君子吹噓之力造福不淺票號匯兌必給匯資自是正辦王湛園先生遺捐五千金雨田觀察匯至平遙委員提解不過數日深勞籌畫祝庭軍門舫仙方伯子美軍門及李朱黃諸君皆吾湘巨室一舉一動國人相爲則倣此次慷慨傾囊先爲之倡湘中好善樂施之士莫不聞風興起將來捐款必

大有起色額慶奚如至鹽飭加價終恐有累於民似不宜顧此捐彼高明當以爲然晉捐已照黔章推廣非挾章所可並視將來接濟深賴乎此惟祈鼎力勦助耳梓鄉瑞雪渥被自是今年豐稔之兆此間自臘底得雪寸餘後入春以來尙未沾膏澤也

致李俊帥

前貢寸函懇求借撥銀二萬兩解交吳清卿太史所派採糧委員李從九領收計程已邀雅鑒晉中冬賑仰仗仁鄰協助得以勉度殘年開春後各屬紛紛請糧情形急迫之至溯自上年夏秋開賑所需糧石均由津門轉運前來半載於茲仰承伯相一力維持墊款代運歲底清算計墊發銀二十餘萬兩之多八十

1
餘處災區寒冬無乏食之虞全仗伯相慈施格外今春賑需糧更切所有續撥江廣漕六萬石及年內購定津奉等處雜糧並各處善士捐集米穀亦約十餘萬石早已抵津待運山右既無自運之費津局又以墊發過鉅再無可以騰挪雖尙承伯相應承允爲設法核計非數十萬兩不能濟事糧石遲到一日災黎卽餓斃甚多連日熟計苦思竟無良法惟有仰求仁賢格外垂卹大發慈悲不論如何爲難不拘係何款項務祈通融挪借將奏准借撥之六萬兩一款派員由輪船運解伯相處兌收總以二月內能到津門俾抵津之糧得以速卽開運感禱靡旣明知楚省捐輸之款已蒙陸續匯解天津前此又懇撥交周口二萬

金何敢仍以六萬之數奉懇無如處此莫展一籌之會正有水
窮山盡之虞非有鉅款到津賑糧不能速運不得已汗顏冒瀆
統祈曲諒寬原日後捐款截清晉賑告竣如總計撥借較鉅必
當設法先行歸還決不有辜高誼也萬乞俯鑒刻不可緩之窘
況萬不得已之苦衷迅賜施行曷勝禱切悚切之至

復王鼎丞

前日接到式帥來咨極言東漕不應分運獲鹿比卽速辦咨覆
並已知照台從照辦二十四日附片一稿二十五上午接十六
日手書一一具悉東省官吏上下固執彌甚旣不可以情動又
不可以理爭來咨滿紙皆膠固之詞憤懣之氣貌似爲晉籌計

甚善實則無非慳吝自私接閱後未嘗不思據實奏陳請飭水陸分運繼思發付銀米其權操於山東彼既不以陸運爲然若再與之爭辯必更遷延發兌以一時之意氣誤急切之賑需不惟不敢亦不暇且獲鹿接運津門之糧已十五六萬石東漕正月運到趁空挽輸本屬兩便今驟脚日少津糧已有待運之虞加運東漕實難必其不誤東省之留難作梗必不以運獲鹿爲然安知非暗中成全晉中利鈍有不可令人思議者平心靜索祇好除己陸運若干外餘悉仍由東省自運道口交兌丁觀察接收閣下接信後務將置備口袋價值陸運車資一一清釐一面移請子蕃除已陸運外迅將漕米七萬數千石迅速催齊

開運水運各事晉中均不必預聞一面馳赴道口晤商丁孟翁
觀察夏壽山直刺將接運事宜籌議周詳指示接辦至運費五
萬如已悉數領到除付陸運車價盤置備口袋外餘銀若干卽
由執事帶至道口交丁觀察接收如未全領則落得亦請東省
同漕米一並在道口交付省得沿途擔心至俊丞所云三萬金
旣係官捐議定解周口買糧之用斷不肯幫協運費總之東省
諸君悉奉式帥儉嗇成規所言所見無非私圖閣下千萬不必
再冀嘔氣大凡辦天下之事者皆能忍天下之辱者也此間應
商應辦之事甚多切盼早旋面談一切連日咳病加劇並祈格
外珍玉念切禱切片稿鈔呈雅閱

復閻丹初

封函欲發奉二十四日手書如接塵談渴思藉慰賑務難辦弟
去年早已智盡能索幸仗我公共濟其艱諸事得承宏畧弟固
叨教無量災黎尤蒙福無窮乃以愛民之殷迫爲責己之切捧
書載誦仰佩靡涯諸事謹爲復陳統乞垂照

一禁煙疏稿昨已鈔咨當積重難返之秋祇好如此施行徐徐
收效

一吳令仍飭赴任蒲解捕務已否另選賢員馬牧一人深慮疲
於奔命必須派員幫助乃可周密無遺應派何人仍求裁奪札
飭

一訏翁赴邯鄲二月望間不可再遲望囑早日成行爲禱各屬
春雨均缺民間盼望甚殷麥秋再一歉收大局正不可間日復
一日令人望眼欲穿

一東省運費已截留尙未全付王道八萬石又改議全運道口
將來總可以五萬石由會興鎮聽我公接濟南路各災區什貼
之糧亦可由平陽酌撥若干聽候撥用刻下所最急最要者惟
運費無措耳四川四萬兩仍解省城以充運費感佩之至一黃
河運道鄙意逆流稽遲總非所計豫境搶案頻聞更不能不防
意外之虞未知聽算探聽如何情形念甚念甚弟擬派張建侯
帶二三營過河或五營步隊一營馬隊均過河可也

一包頭之糧去冬曾派員往購數千石專係小米嗣以力量不及各處均往彼處購買糧價日增不能多辦今將糧價運省腳價並甯夏開來糧價一並鈔奉包頭糧價係去年原辦時開來現在恐不能如此便宜且聞糧亦甚缺至黃運河津一層係由磧口換船不能由歸化直達恐亦遲緩不能應急轉致欲速反遲似亦可作罷論未識尊意以爲然否

一設局平糶一事前次已詳晰奏明此時似可不必再奏尊處儘可放心辦理無庸計及成本將來報銷悉由省中總支總銷河東不必顧慮也

一榮河案已札飭卓道穆守等迅速訊結詳辦另箋所示各節

一一祇悉菊翁周歷稽查詳明確當祇佩彌深茅津渡半釐嚴
札未貞不准分文索取當不敢再蹈前轍時事孔亟悉仗明公
擘畫經營于祈弗過焦愁節勞珍重百叩百叩

復郭意誠

頃奉鈞函遠辱拳注慚感交深弟百無一能適承累年旱荒之
後諸凡無所措手又目見地方之凋敝牧令之積習不得不力
爲補救以冀轉移於萬一鼓尾眾母之歌謡固寸心所未計也
通省幾成普災其未報災者十餘瘠州縣耳合八十餘廳州縣
之災黎仰給於十餘屬所產之米糧其有幾全又加以各餉協
濟之迫呼雖巧婦亦難爲無米之炊矧疏拙如弟者乎其不見

諒於西帥也固宜幸賴。廟堂周詳之擘畫鄰國救濟於手援故得補苴一時然而貧者負戴而不免於死亡富者剜肉而難續爲接濟苟延旦夕元氣愈傷竊歎晉民從此生聚非十年不能爲功不意天意不回去秋七八九月亢旱愈甚大小二麥均未播種入冬微雪及寸卽爲祥瑞刻已雨水節將驚蟄矣春日載陽膏澤猶靳轉瞬番風卽過種不及時哀我晉人不知何辜而罹此重阨也讀周餘黎民靡有子遺之什可知作詩者憂患深矣丹翁樂道有年不得已爲蒼生復起其老成之識正直之氣洵足濟時艱而挽末俗此老實有造於晉民不淺扶持善類轉移頽風其在斯人乎老兄耕釣所留山川增色襟上酒痕座

間風月無非適性陶情之具乃無心以出岫卽倦游而知還其
亦有秋風鱠鱸之感乎恐蒼生之望從此愈殷矣筠老孤忠耿
耿有心人莫不共諒知我罪我尼山且致慨當時悠泛之口何
足深論惟劉雲生素被覆翼之恩乃竟同室戈操則足令志士
氣短禁煙一節樞中未將原摺施行外間無從附和且亦萬難
盡絕根株大約此病與本朝相爲終始令人浩歎來教俾後來
者知所警動而不墮於迷途亦救世之寶筏歟

復郭筠仙

去春奉到手函道遠未遽奉覆歉仄時深頃奉臘八日賜書並
讀大疏尊先儒而明正學不惟闡揚潛德且俾天下後世知傳

經翼道之功不可以小疵掩其大醞洵乎持論平而信道篤矣
疏中推闡傳道傳經之殊途同歸於聖學則理通一貫於祀典
則論定千秋竊惟船山發明程朱遺旨博大精深超元明諸儒
而直接心源尤爲先聖昔賢功臣我公此疏推原從祀之制表
彰扶翼之心有功於先儒者不淺直道猶行正氣必伸此後有
讀公疏因而考證船山學行者必能感發興起闡幽光於旣往
振墜緒於將來斯理不泯固可爲船山共信也已文正公序船
山遺書雖有醻駁互見之言而推崇實深不意後之人援爲口
實今得公疏而論始定文正推崇船山之心可大白於天下是
公不惟爲功於船山而於文正之寸心亦相喻於隱微矣弟於

王氏毫無表揚徒以刊輯成書忝附名大疏中慚汗奚如至我
公遠渡溟渤馳驅十萬里外賢勞鞅掌維持中外近又奉兼使
之命猶不忘咨度咨諭之義不遺在遠下詢芻蕘竊謂大臣
以道事君祇圖宗社之安危不論人言之臧否況我公所處實
際時艱人以畏事而巧於趨避公以任事而羣肆詆譖雖吾道
日孤而乾坤不息彼肆無忌憚持論顛倒之輩豈足以知高深
耶弟以軫財適逢大祲涓滴無補支絀時形往歲合肥爵相施
振畿輔以一身任之而綽然有餘弟今撫此災區合各省之籌
濟而日計不足若非合肥處處扶持尚不能有此存活時地固
有不同然而人之才力度量相越豈不遠哉我公利濟爲懷尙

自足事公書卷之二
祈爲國愛身爲道自重早回中土匡正曲學俾天理人心所繫屬之躬長爲赤海神州所矜式華夏幸甚

致劉南雲

昨以晉中頻年大祲萑苻竊發不得不添募勇丁以資防禦奏請添募湘勇五千由仁棣統帶來晉其應如何召募之處仁棣宿將自能妥爲辦理比已函達一切並鈔錄奏稿附呈台覽茲奉諭旨准行特將召募事宜臚列於後

一召募必用湘人也昔年粵逆倡亂克復城池殲除首逆皆賴湘軍之力近日收復新疆全城湘軍又居首功是湘勇得力之明效大驗也此次添募防晉勇丁均宜在湘鄉集募以期迅速

其應募之勇必須取具保結附冊以便清查總以多招湘鄉之人爲妙其餘各屬之人非油頭滑面有市井氣卽染衙門積習非第爲行軍得力起見亦梓里釜底抽薪之策也

一勇丁必須揀擇也行營打仗全仗年富力強氣力精壯倘或已過三十歲則難耐山西之寒及登山踰嶺之苦惟祝多選少年有力耐勞之士斯得之矣文幫辦文護哨亦宜擇年力壯強能行路能騎馬者爲要

一約束必須嚴明也行軍之規第一禁奸淫其次禁擄掠而近來習俗之壞尤以吸食洋煙爲最勇丁坐營則按日操練行營則臨陣衝鋒原貴其精強故名曰勇若吸食洋煙則氣力必減

懶惰必慣無事旣行路恐後有事又安望其奮勇爭先乎此勇士吸食洋煙爲軍營所大忌也營中自管帶幫帶哨官以至散勇均宜先嚴此選至於長夫伙勇一營之軍裝食用皆資其挑負所關匪輕亦宜一律遴選

一部伍必須整齊也操演陣法固有步伐之節止齊之規不可稍紊卽拔營行師亦須各歸各隊魚貫而行庶爲有制之師以仁弟之高明固無煩兄之計慮也

一軍裝必須添製也器械帳棚雖已咨明由湖南軍需局借用然東南軍務久已貳事一朝取用十營器械帳棚誠恐不敷動用必須設法添製除借用若干外所少鎗礮器械帳棚卽在長

沙添製亦無不可至製造銀兩由長沙協款內動支抵晉再行報銷

一營名必須豫定也召募十營以中營千人爲統帥所居之處前後左右各分二營以相照應輔翼可否卽用南中南前南後南左南右均聽鴻裁或另酌用佳名亦由仁弟施行

一關防必須先刻也地隔五千餘里未能遠寄應請仁弟在長沙自行篆刻統領南字馬步全軍記名布政使司關防以便募勇開用其餘且均設書帶到晉後由仁弟面談定妥再行篆刊頒發可也

一馬步必須兼用也接仗固需步兵衝鋒先資馬隊西北之地

雖多高山峻嶺然曠野平原非馬隊不足以資馳騁所募十營擬俟抵晉後面商定以一營改爲馬隊二營召募時遇有騎射精熟者儘可收錄來時編入步兵隊伍內以便抵晉後挑選操演馬隊兄祇買馬與鞍轡交仁弟而已

一取道宣期捷便也由楚達晉水道由漢口以至樊城沂流而上難期迅速不如自漢口登岸走信陽州出周家口以達河南之豫州由豫過黃河不必走茅津渡不必走清化鎮因晉豫皆被災太重糧價昂貴勇夫日給之小口糧不足以敷食用不由豫逕走東大道以達直隸之獲鹿由獲鹿以達晉省此路糧食較便益且係大道並不迂緩如勇丁小口糧不敷一日之食

卽早起大口糧亦無不可均由仁弟奪定施行以上數條就管見所及者而備及之尙有思慮未周之處統祈鴻裁臨時酌量辦理爲禱

致朱茗生

頃閱邸抄欣訖 九重塵念炎黎復撥帑銀二十萬兩漕米十六萬石分濟晉豫災區苟 皇仁之迭沛實曠古所罕聞晉中自入春以來未沾渥澤南路河東各郡被災最重之區饑民之餓斃者已十之五六耳不忍聞實堪傷慘糧價日昂不惟極貧之民每日例賑銀米難圖一飽卽中戶之民亦皆變爲極貧苦於銀賤米貴枵腹待殍丹初先生來函謂銀錢不能充口腹米

粟不能生翹翼蒿目災黎空嗟束手籌辦之艱至斯而極朔代
股匪葛清秦極力勦辦一戰撲滅逆首熊六幸已擒拏正法其
餘各郡縣蠕蠕欲動者尙多萬一起事蔓延各屬乘機竊發晉
局不堪設想本省止此兵力地廣隘多南路鹽梟悉變爲盜陝
豫蠢動者不止一處人少難資分佈頃已遵 旨飛調劉南雲
募勇五千迅速來晉明知餉項萬分支絀無術以善其後然不
得不救今年秋冬之急惟盼南雲於晉局尙未決裂之前早到
則防禦有資矣細思天意未回甘霖莫沛百端祈禱迄無一應
時局如此其奈之何弟與丹初先生簪舫諸友均已智盡能索
恐難補救於萬一然救得一分算一分救得一日算一日昨接

子和制府來咨胡豹子一股竟有四千人之多在南召一帶起
釁但能早解散斯晉省糧路之幸也

致張建侯

正初奉復寸函度邀察照奉撥東漕八萬石奏明以五萬餘石
由道口運孟縣渡黃至洛陽以達會興鎮而入晉境並請貴軍
派撥馬步扼要駐紮節節押護以免疏虞業經另備公牘咨會
台端查大河南北地段綿長饑民盈路布置必得格外周密以
期弭患未然或於貴部內酌派馬步若干營擇要扼紮或因地
段遼闊僅爾酌派不敷分布逕須全軍移駐節節安置亦無不
可應請閣下親詣洛陽一帶察看情形妥爲布置想公忠夙抱

必能不憚煩勞安速施行曷勝翹企洛陽局務現委揭令傳淇
經理該員諸未諳練而於豫省人地不甚熟悉尙望聯爲一氣
隨時指示是所切禱

復馬級三

頃奉惠函具悉後山游匪又有羣聚搶劫情事當卽如示飛檄
易副將星速拔營矣後山地面遼闊匪徒最易潛蹤加以歲歉
年荒饑民盈路尤易勾結爲患前經肅清之後弟卽深慮其散
而復聚因屬閣下管轄之區責無旁貸特奏明增兵益餉責成
專軍前往駐紮原爲保靖地方之計非徒爲張皇自衛之具原
冀綢繆未雨之先非專備勦辦旣起之後今旣不能防患未然

致復乘機竊發上與朝廷責望之意已屬大違若不殲竭血誠迅速勦辦以期淨絕根株萬一中旨詰責實難措詞覆奏閣下久厯戎行現在兵力復厚想此烏合小醜不難滅而朝食大要在分段設卡以清勾結之源四路搜擒以洗藏匿之窟恩威並用勦撫兼施想閣下胸有成竹必能迅速蕩平事大振聲威於邊陲也一切籌辦情形隨時惠示爲盼

復馬級三

十七日接展惠書具悉勦捕一切情狀正裁復間十八九兩日連准大咨來函欣審後山內外匪徒漸次殄滅辦理尙洽機宜遠慮爲之一慰惟善後事宜亟應妥爲布置已除之患須常存

未除之心前事之疏須力圖後事之救後山一帶雖地面遼闊漢蒙雜處然能分段設卡節節查防而又時出勁騎於箐深林密之處循環搜捕則內可掃藏匿之患外可清勾結之源歸包一帶庶安枕無憂矣是在閣下嘗臚臥薪身先士卒上副朝廷之責望下惠閭閻於安全將見勲望彌隆仰邀懋賞榮何如之近日籌辦情形尙祈詳示總期淨絕根株毋令一名漏網毋爲日後留患所稱董王各逆業經傷斃是否確有實據亦應嚴切查明據咨陳奏渠魁不翦終爲邊害不可不慎圖也朔州教匪滋事頃接葛鎮等來稟已於十五日得一勝仗立將首逆熊六殷世興等生擒餘匪亦斬獲殆盡尙快人心包歸旣告肅

清易副將調往一節可作罷論至由殺虎協挑派兵丁五百名一說更可無庸費力兵不貴多而貴精亦顧訓練爲何如耳

復李中堂

頃奉三月初五日賜函知前肅兩函已蒙崇鑒收捐實數既與豫省商明畫一辦理似未便稍有歧異貽人口實昨接津局來詳已分咨各省矣捐案統歸直隸請獎亦以事多窒礙故有由各該省徑行奏咨之議惟接他處覆書以本省亦有捐務恐賑目繆轄未肯遽允若由晉省辦理則公文往返爲日稽遲得獎速捐生未必因此踴躍得獎遲必有因此避就者現惟有敦懇各省仍照前議而已江廣漕糧已起運二萬數千石樂山雲甫

諸君仰承訓示籌議由京添雇駱駝徑運什貼運務可期迅速
新撥南漕已蒙於到津蘇漕內截撥祇能由獲鹿東陽分途運
解昨接丹初先生來書擬將此項酌分數萬石爲南路州縣賑
款此路應以道口轉運爲宜惟道口雖已開局運務如何尙難
預定將來或由獲鹿道口兩處或並蘇三處分運統俟酌度情
形擬定分運數目再行備具公牘奉陳至米質低潮遠道裝運
尤虞霉變如中堂實無幹旋之法亦屬無可如何淮皖捐麥定
議走道口清化一路俟啟運有期卽當分飭遵辦此間人力財
力兩絀委員中求其幹練而能變通者甚不易易蘇漕辦事之
員頗難其選卽如津門一帶非中堂廣爲籌畫則晉省更無從

著手矣聞轄境已得透雨想可普沾晉中日事祈禱百計倡施
邯鄲鐵牌現已奉請到省展拜之餘辨認字蹟知爲中堂昔年
所鑄此番災賑晉民受澤最深人事相關天心暗合當能從此
大賦滂沱使郊原雨足也而載頌功德者固已衢巷紛傳矣近
日召諫諸公紛紛以災務陳奏兼歸咎政府 兩宮言無不聽
以期上下交修盛德如公猶自思省如荅之目覩災黎流亡而
一無補救其負罪更爲何如耶西事功業旣定牽制尙多不知
當事者將何以措置耳甯朔幸告無事豫西胡豹子一股聞亦
解散此晉省運路所必經不知果已淨絕根株否

復山西各京官公函

前因晉省裁種畝粟有妨五穀是以會同丹初先生聯銜具奏
奉　旨允行刊示頒發又恐各州縣辦理不力復經嚴札通行
已不止僅伸令甲矣茲李菊圃太史創爲裁藥釐之議交來兩
稿囑卽疏陳藥釐爲數本屬無多每年不過五六萬金亦何所
吝惜但此不過鄉民藉口之一端去此而謂罷粟即可禁絕恐
亦無此速效仍須地方官嚴禁地方官辦理不力原可執法相
繩此第分所當爲亦力所當盡也然充其量官之失察者例止
罰俸民之違禁者罪止杖八十利之所在趨之若驚雖有嚴刑
峻法亦難保其必行況法律本輕乎挽旣倒之狂瀾而欲以旦
夕求弟自問無此才力此弟之苦心所堪白愧者若照所議陳

奏恐有妨礙京城洋藥稅大局且以後無以據塞大部索餉之
文爲患太切不得不深思熟計也原稿照鈔奉呈查閱